

四庫全書

子部

欽定四庫全書

名賢氏族言行類稿卷十三

宋 章定 撰

表 二百六十五

姓纂媯姓舜後陳胡公之胤胡公生申公申公生靖
伯甫甫七代孫莊爰伯諸生濤塗以王父字為氏代
為上卿字或作爰轅其實一也

史記表盎

漢書作爰盎

楚人也字絲以兄噲任為中郎諫

宦者趙同參乘卻慎夫人同坐亦以數直諫不得久
居中丞相申屠嘉引為上客 後為楚王相所言不
用病免居家與閭里浮沈鬪雞走狗盜雖家居景帝
時時使人問籌策

後漢袁安字邵公汝南人舉孝廉除陰平長任城令所
在吏人畏而愛之為河南尹政號嚴明 初安父沒
訪求葬地道逢三書生指一處云葬此當世為上公
須臾不見遂葬其所占之地故累世隆盛 子敞字

叔平少傳易經歷位司空廉勁不阿權貴

袁閔字夏甫父賀為彭城相及卒閔不受賄賂經扶
柩手足流血見者莫不傷之 徵召不應以耕學為
業

魏志袁紹字本初高祖父安為漢司空自安以下四世
居三公

袁渙字曜卿父滂字公熙為漢司徒純素寡欲不言人
短中立於朝愛憎不及為郡功曹姦吏皆自引去

魏初為郎中令行御史大夫事不為瞰察之行時人服其清貌似和柔然其臨大節處為難雖責育不過也子侃亦清粹閒雅有父風歷郡守尚書子孫世有名位

晉書袁甫字公胄以詞辨稱嘗詣何勗自言能為劇縣勗曰惟欲宰縣不為臺閣職何也曰人各有能有不能乃除松滋令轉淮南國大農

袁悅之字元禮能長短說為謝玄參軍

袁瓌字山甫為呂令又為丹陽令除廬江臨川二郡太守又除國子祭酒上疏請明禮學以流後生國學之興自瓌始 子喬字彥叔初拜佐著作郎博學有文才 孫山松少有才名著後漢書百篇為吳郡太守瓌弟猷字申甫少與瓌齊名代瓌為呂令又為武康兄弟列宰名邑論者美之

袁準字孝尼以儒學知名官至給事中 孫耽字彥道少有才氣倣不羈為士類所稱為歷陽太守 耽

子質字道和以孝行稱歷東陽太守 質子湛字士

深少有操植以冲粹自立自中書令為僕射 湛弟

豹字士蔚博學善文辭有經國才後為丹陽尹

文苑表宏字彥伯有逸才文章絕美曾為詠史詩是其

風情所寄 作東征北征二賦 出為東陽郡謝安

取一扇以贈行答曰輒當奉揚仁風慰彼黎庶 子

明子最知名官至臨賀太守

南史袁淑父豹博涉多通文采道艷累遷尚書吏部郎

袁粲字景倩為宋室忠臣

袁粲字緯才父覲好學美才早有清譽仕宋位武陵內
史粲舉秀才仕齊為中書郎兼御史中丞從弟昂
字千里容質脩偉冠絕人倫本名千里齊武帝謂曰
昂昂千里之駒在卿有之今改卿名為昂即字千里
為御史中丞不憚權家當時號為正直仕梁為吏部
尚書武帝曰齊明帝用卿為黑頭尚書我用卿為白
頭尚書良以多愧在朝謬謬世號宗臣游處不雜

入其門者號登龍門 自初及末無虧風範從微至著皆為稱職蓋一代之名公也 子君正字世忠以貴公子早得時譽 為豫章內史斬巫師萬世榮一郡無敢行巫 子樞字踐言好學手不釋卷非公事未嘗出游榮利之心淡如也仕梁為吏部尚書舉薦多會上旨清白自居文武職司鮮有遊其門者後遷左僕射 弟憲字德章累遷御史中丞嘗陪宴承香閣賓退後陳宣帝留憲與樊俊徙席山亭談宴終日帝

謂俊曰袁家故為有人 後主曰袁德章實骨鯁臣
即詔為尚書僕射

袁敬字子恭君正之弟純素有風格仕陳歷都官尚書
太常卿 敬弟泌字文洋清正有幹局歸陳累遷散
騎常侍兼侍中

文學袁敬自重其文謂人云我詩應須大材造之不爾
飛去

文學袁仲明有學行撰晉史未成而卒

袁峻字孝高訥言語工文辭擬官箴獻之梁武帝賜束帛直文德學士省

北史袁式字季祖歸魏為上客與崔浩一面便盡國士之交性長者雖羈旅以迫而清貧守度不失士節時人甚敬重之子濟位魏郡太守政有清稱

袁翻字景翔少入東觀兼著作佐郎累遷黃門侍郎後拜度支尚書弟躍字景騰性不矯俗篤於交友上明堂議當時稱其博洽子聿修字叔德九歲州辟主

簿仕齊行博陵太守大有聲績為信州刺史為政
清靖不言而化鰥寡孤幼皆得歡心及還人庶道俗
追列滿道或將酒脯涕泣留連為尚書郎十年未
曾受升酒之遺邢邵常呼為清郎後為太常少卿
出使巡省邢邵送白紬為信不受邵曰今日復作清
卿矣

袁充字德符仕陳十七為祕書郎好道術善占候在隋
領太史令

唐袁恕已滄州人謚真烈 孫高字公頤有節尚擢進士第德宗將起廬杞高當草詔奏曰用為相失天下望遣使慰高曰朕惟卿言切至已如奏韋倫曰高言勁挺自是陛下一良臣宜加優禮 憲宗時李吉甫

言其忠謇贈禮書

袁高能使所居官大

見柳子厚記

袁滋字德深蔡州人憲之後彊學博記少依元結讀書以處士被薦授校書郎為華刺史政清簡流民至者給地居之名其里曰義合以慈惠為本民愛向之滋

行者老邁道不得去代者楊於陵使諭曰吾不敢易
袁公政人皆羅拜乃得去徙義成節度使嚴備而推
誠信務在懷來李師道田季安畏服之居七年百姓
立祠祝祭 性寬易與之接者皆可見其肺肝

袁朗長安人陳後主詔為月賦一篇灑然無留思後主
曰謝莊不得獨美於前矣復詔為芝草嘉蓮二頌歎
賞尤厚遠祖滂為漢司徒至朗凡十二世其間司徒
司空者四世 朗孫誼為蘇州刺史司馬張洵嘗白

誼曰州得一長史隴西李亶天下甲門也誼曰夫門戶者歷世名節為天下所高老夫是也山東人尚婚媾求祿利耳至見危授命則無人焉何足尚邪沛大慚從父弟承序補建昌令治尚慈簡吏民懷德高宗之為晉王也太宗崇選僚屬問梁陳名臣子弟誰可者岑文本曰昔陳亡百司奔散有袁憲者朝服立後主旁白刃不避也其子承序風操清亮無愧先烈乃拜晉王友從弟利貞敬孫高宗時為太常博士

周王侍讀及王立為太子百官上禮帝欲大會羣臣
命婦合宴宣政殿利貞上疏諫以為非命婦宴會之
所帝納之詔曰卿奕葉忠鯁能抗疏規朕之失不厚
賜無以勸能者賜物百段

方技袁天綱益州人善相皆有驗詳見本傳

五代表建豐從莊宗入魏取衛磁洺三州拜洺州刺史
擊梁將王千斬首千餘級獲其將校七十餘人遷相
州刺史從戰胡柳指揮使孟謙據相州叛連豐還討

平之徙隰州刺史

袁象先宋州下邑人也。恕已之後，父敬初尚太祖妹萬安大長公主。象先以梁甥為宣武軍內外馬步軍都指揮使，歷宿洛陳三州刺史。平盧軍節度使莊宗滅梁，賜姓名為李紹安，改宣武軍為歸德軍。曰歸德之名為卿設也。遣之還鎮。卒。子正辭官至刺史。周世宗時為橫海軍節度使，積錢盈室。室中嘗有聲如牛。人以為妖，勸其散積以禳之。正辭曰：吾聞物之有聲。

求其同類爾宜益以錢聲必止聞者傳以為笑

爰 二百六十六

姓纂陳胡公九代孫爰伯儲之後魏郎中令爰節

後漢爰延字季平陳留人性質慤 舉賢良方正遷侍

中拜大鴻臚

轅 二百六十七

姓纂陳轅濤塗之後漢功臣禦兒侯轅終古

轅濤塗字宣仲陳大夫也

史記儒林轅固生者齊人也治詩孝景時為博士以固
為廉直拜為清河王太傅 武帝立復以賢良徵固
諸諛儒多疾毀固曰固老罷歸之時年已九十矣時
公孫弘亦被徵側目而視固固曰公孫子務正學以
言無曲學以阿世 齊之言詩皆本轅固生

垣 二百六十八

姓纂漢西河太守垣恭之後 略陽南燕慕容德吏
部尚書垣敞石季龍時自略陽徙之於鄴敞與子遵

苗並降晉敞拜龍驤將軍遵散騎常侍苗屯騎校尉
苗生護之

南史垣護之字彥宗族姓豪強祖敞仕苻氏為郎中令
護之少倜儻不拘小節宋武帝時為殿中將軍遷鍾
離臨淮太守豫州刺史

垣崇祖字敬遠護之弟子年十四有幹畧護之曰此兒
必大吾門為瑯邪蘭陵二郡太守齊高帝時用為豫
州刺史進都督大破魏軍陳力疆場

垣榮祖字華先崇祖從兄齊高帝立預佐命勲封將樂
縣子閎字叔通榮祖從父宋孝武時為交趾刺史
罷還資財鉅萬為益州刺史蜀還之貨亦數千金凡
蠻夷輸財贖罪謂之賤時人謂閎被賤刺史子愷
伯少負氣豪俠尤為武帝所重以為直閣將軍閎
弟閱為九真郡著信南中閱子曇深以行義稱為
臨城縣罷歸得錢十萬以實宅奉兄退無私蓄

樊

二百六十九

姓纂周文王子虞仲之孫為周卿士食采於樊因邑
命氏今河內陽樊是也周有樊穆仲字山甫樊仲皮
樊濟並其後也又殷人七族有樊氏仲尼弟子樊遲
魯人蓋其後也

新序樊於期逃秦之燕

史記樊噲沛人也項羽目曰壯士排闥見高帝封舞

陽侯 願得十萬眾橫行匈奴

季布傳

後漢樊重世善農稼貲至巨萬而賑贍宗族恩加鄉閭

年八十餘合素所假貸人數百萬遺令焚削文契

子宏字靡卿封壽張侯不求苟進常以前世貴戚為戒宗族感其化子儵嘗刪定春秋章句世號樊侯學樊準字幼陵少勵志行脩儒術補尚書郎上疏勸興儒學拜鉅鹿太守外禦寇虜內撫百姓郡境以安

酷吏樊曄字仲華拜天水太守政嚴猛道不拾遺

樊英字季齊隱於壺山之陽順帝策書脩禮立繡徵之樊志張南鄭人博學多通隱身不仕

南史樊毅字智烈家本將門少習武善騎射累遷為護
軍將軍弟猛字智武倣儻有幹略膽氣過人青溪
之戰卒平侯景後為左衛將軍

北史樊子鵠代郡人仕魏兼尚書行臺政有威信為
殷州刺史歲旱乃勸有粟家分濟貧者亦遣多種二
麥州內獲安

樊子蓋字華宗仕隋為武威太守以善政聞煬帝曰人道
公清定如此否謝曰臣安敢清止是小心不納賄耳

乃賜口味百餘斛子蓋曰願奉丹陛帝曰公侍朕則一人而已委以四方則萬人之敵也 後陪宴積翠池帝親以金盃屬子蓋酒曰良算嘉謀侯公後動即以此盃賜公用為永年之瑞

樊深字文深事繼母甚謹講習五經晝夜不倦 習天文算歷之術儒者推其博物 除國子博士

文苑樊遜字孝謙專心典籍舉秀才為第一楊惛曰文章成就莫過樊孝謙 為員外將軍

循吏樊叔畧仕隋為汴州刺史甚有聲稱遷相州刺史
政為第一璽書褒美頒示天下百姓語曰智無窮清
鄉公上下正樊安定

封清鄉安定公

徵拜司農卿

唐樊澤字安時河中人舉賢良方正次潼關雨淖困不
能前有熊執易者同舍逆旅哀之輟所乘馬傾褚以
濟自罷所舉是歲澤上第擢左補闕有武力喜兵法
議者謂有將帥器召對延英德宗嘆其論兵與我意
合遷山南東道節度使每射諸將憚其材武數與李

希烈確擒剽將張嘉瑜杜文朝等取唐隋二州子
宗師字紹述元和三年擢軍謀宏遠科歷綿州刺史
徙絳州治有績家饒於財散施姻舊妻子告不給
宗師笑不答力學多通解著春秋傳魁紀公樊子凡
百餘篇韓愈稱論議平正有經據嘗薦其材

元二百七十

姓纂左傳衛大夫元咺之後其先食采於元因氏焉
今元城是也其後子孫無聞河陽洛陽縣後魏書

官氏志曰拓跋氏改為元氏自云黃帝子昌意之後
居北土代為鮮卑君長宋書云李陵之後昌意三十
九代至昭成帝什翼健始號代王都雲中道武改號
魏即尊號孝文帝都洛陽改為元氏十一代十五帝
一百六十一年

北史元景安沈敏有幹局妙閑馳騁有容則每梁使至
恒對客騎射見者稱善除豫州刺史人物安之

元文遙字德遠敏慧夙成仕齊授中書舍人宣傳文武

號令楊遵彥云堪解穰侯印者必在斯人 遷左僕射性和厚與物無競 子行恭美貌兼俊才位中

書舍人

元定字願安內沈審外剛毅累從周文征伐諸將稱其長者 拜岷州刺史威恩兼濟甚得羌豪之情

元諧洛陽人家世貴盛以軍功累遷大將軍 拜寧州

刺史頗有威惠 性剛愎不能取媚於左右嘗言於隋文曰臣一心事主不渎取人意

元胄少英果多武藝有不可犯之色仕隋遷右衛大將軍素有威名拜靈州總管北夷甚憚焉

元巖字君山剛鯁有器局以名節自許仕隋拜兵部尚書每有奏議侃然正色廷爭面折無所回避上及公卿皆敬憚之

元壽字長壽在隋為基州刺史有公廉稱入為太府少卿

唐元結後魏常山王遵十五代孫父延祖調春陵丞輒

棄官去安祿山反召結戒曰而曹逢世多故不得自
安山林勉樹名節無近羞辱云卒門人謚曰太先生
結少不羈十七乃折節向學事元德秀天寶間舉
進士陽浚見其文曰一第恩子耳擢上第復舉制科
會天下亂沈浮人間蘇源明見肅宗薦結可用召詣
京師上時議三篇帝悅曰卿能破朕憂 史思明亂
結建言賊銳不可與爭宜折以謀帝善之因命發宛
葉軍挫賊南鋒結屯泌陽守險全十五城荆南呂諲

請益兵拒賊結佐諲府又參山南東道來瑱府時有
父母隨子在軍者結說瑱曰孝而仁者可與言忠信
而勇者可以全義渠有責其忠信義勇而不勸之孝
慈耶將士父母宜給以衣食則義有所存矣瑱納之
瑱誅結攝領府事會代宗立固辭丐侍親歸樊上授
著作郎益著書作自釋曰河南元氏望也結元子名
也次山結字也出業載國史世系在家諱少居商餘
山著元子十篇故以元子為稱天下兵興逃亂入荷

玕洞始稱猗玕子後家瀼濱乃自稱浪士及有官人
以為浪者亦漫為官乎呼為漫郎既客樊上漫遂顯
樊左右皆漁者少長相戲更曰聲叟彼謂以聲者為
其不相從聽不相鈎加帶笊箸而盡船獨聲齧而揮
車酒徒得此又曰公之漫其猶聲乎公守著作不帶
笊箸乎又漫浪於人間得非聲齧乎公漫久矣可以
漫為叟久之拜道州刺史為民營舍給田免徭役流
亡歸者萬餘進授容管經略使身諭蠻豪綏定八州民

樂其教至立石頌德

結屋浯溪之上亭曰唐亭臺曰
浯臺歌頌大業刻中興頌於崖

上

元載字公輔鳳翔人嗜學工屬文天寶初詔舉明莊老

列文四子學者載策入高第至德初為度支郎中占奏

辨給肅宗異之後籍其家鍾乳五百兩胡椒八百石

他物稱是東坡詩云何元相國萬鍾不滿欲胡椒銖

兩多安用八百斛以此殺其身何翅抵鵲玉

元稹字微之河南人九歲工屬文十五擢明經判入等

元和元年舉制科對策第一拜左拾遺性敏銳遇事輒舉陳西北邊事憲宗悅召問得失元和末召拜膳部員外郎稹尤長於詩與白居易名相埒天下傳諷號元和體宮中呼為元才子在越時辟竇鞏鞏工為詩與之酬和故鏡湖秦望之奇並傳時號蘭亭絕唱稹始言事峭直欲以立名中見斥廢十年信道不堅乃喪所守

元德秀字紫芝河南人質厚少緣飾少孤事母孝舉進

士不忍去左右自負母入京師既擢第母亡廬墓側
食不鹽酪藉無茵席服除以窶困調南和尉有惠政
不肯婚人以為不可絕嗣答曰兄有子先人得祀吾
何娶為 家苦貧求為魯山令玄宗在東都酺五鳳
樓下命三百里縣令刺史各以聲樂集河內太守輦
優伎數百德秀惟樂工數十人聯袂歌于為于于為
于德
秀所為
歌也 帝歎曰賢人之言哉德秀益知名所得奉祿
悉衣食人之孤遺歲滿筭餘一縑駕柴車去 愛陸

渾佳山水乃定居不為墻垣局鑰家無僕妾彈琴以自
娛善文辭作足士賦以况房琯歎曰見紫芝眉宇使
人名利之心都盡蘇源明常語人曰吾不幸生衰俗所
不恥者識元紫芝也 天寶十三年病卒 家惟枕
履簞瓢而已 族弟結哭之慟或曰子哭過哀禮歟
結曰若知禮之過而不知情之至大夫弱無固性無
專老無在死無餘人情所耽溺喜愛可惡者大夫無
之生六十年未嘗識女色視錦繡未嘗求足苟辭佚

色未嘗有十畝之地十尺之舍十歲之僮未嘗完布帛而衣具五味而食吾哀之以戒荒淫貪佞綺紈梁肉之徒耳 李華兄事德秀及卒諡文行先生天下高其行不名謂之元魯山 三賢謂元德秀劉迅蕭穎士也

元澹字行冲以字行博學通故訓及進士第狄仁傑器之嘗謂仁傑曰聞下之事上譬富家儲積以自資也門下充旨味者多矣願以小人備一藥石可乎仁傑

笑曰君正吾藥籠中物不可一日無也授太常少卿以系出拓拔恨史無編年乃撰魏典三十篇事詳文約學者尚之卒贈禮書

元萬頃從李勣征高麗管書記為郭待封作離合詩遺李勣草檄讓高麗曰不知守鴨綠之險投萬頃嶺外會赦還為著作郎召諸儒論撰禁中萬頃與選凡撰列女傳臣軌百僚新戒樂書等九千餘篇至朝廷疑議表疏皆密使叅處以分宰相權故時謂北門

學士 萬頃孫正與弟及父詢倩俱遇史思明之禍
事平詔錄仗節十一姓而正為冠贈祕書少監以其
子義方為參軍

五代元行欽幽州人也為劉守光裨將守光使行欽募
兵雲間是時明宗掠地山北與行欽相距廣邊軍凡
八戰明宗七射中行欽拔矢而戰亦射明宗中
股行欽屢敗乃降明宗撫其背而飲以酒曰壯士也
因養以為子莊宗已下魏益選驍將自衛聞行欽趨

勇取之賜姓名曰李紹榮莊宗好戰而輕敵與梁軍戰潘張軍敗而潰莊宗得三四騎馳去梁兵數百追及攢稍圍之行欽望其旗而識之馳一騎奮劍斷其二矛斬首一級梁兵解去莊宗還營持行欽泣曰富貴與卿共之拜忻州刺史遷武德軍節度使

宋朝元絳字厚之杭州錢塘人也舉進士為著作郎知靖海縣江淮制置使儂智高反嶺南而宿軍邕州歲漕不足以絳直集賢院為廣東轉運使建潁江水

砦數千以待逋寇繕治十五城樓堞器械皆備軍食
有餘以功遷工部侍郎召為鹽鐵副使擢天章閣待
制知鄆州召為翰林學士工於文辭名流皆推許
之拜叅知政事卒諡章簡

源二百七十一

姓纂後魏同出代北其先聖武帝詰汾長子足孤
七代孫禿髮儁檀生賀歸後魏至太尉封隴西王魏
太武曰卿與朕同源可為源氏賀生懷

北史源賀西平樂都人禿髮倂檀之子後奔魏偉容貌
善風儀太武素聞其名及見器具機辯為前鋒大將
善撫士卒有料敵制勝之謀拜殿中尚書出為冀州
刺史鞠獄以情徭役簡省清約寬裕甚得人心時考
殿最賀政為上策賜衣服器物班宣天下後徵拜太
尉子懷謙恭寬雅有大度為雍州刺史清儉有惠
政後為使持節巡行賑給貧乏存恤有方懷朔鎮將
元尼須與懷有舊貪穢狼藉置酒請懷懷曰今日之

集乃是故人飲酒之坐非鞠獄之所明日公庭始為
使人檢鎮將罪狀之地既而表劾之懷性寬簡不
喜煩碎常曰為貴人當舉綱維何必事事詳細辟如
為屋但外望高顯楹棟平正基壁完牢足矣斧斤不
平斲削不密非屋之病也子子邕字靈和遷夏州
刺史弟子參字靈順錄前後征討功封臨潁縣侯
子彪字文宗學涉機警少有名譽仕齊遷涇州刺
史以恩信待物甚得邊境之和

源師字踐言明辨有識悟尤以吏事自許仕隋累遷尚書左丞以明幹著稱拜大理少卿

源雄字世略少寬厚美姿容以平陳功進位上柱國

唐源乾曜相州人第進士遷諫議大夫景雲後公卿百官上已九日廢射禮乾曜請以大射不可廢開元四年拜黃門侍郎同平章事留守京師治尚寬簡人安之居三年政如始至八年復為黃門侍郎位侍中建言大臣子併求京職俊乂率補外官非平施之道請

出三息補外以示自近始詔美之 歷官清慎恪敏
得名為相十年務為寬平 族孫光裕亦有名居官
號清愿撫諸弟友義為中書舍人後任鄭州為世良
吏 子洧以雍睦保家士友推之

言 二百七十二

姓纂仲尼弟子言偃之後

史記言偃字子游吳人 論語子游為武城宰 子之
武城聞絃歌之聲 家語先成其慮及事而用之故

金定四庫全書
卷十三
動則不妄是言偃之行也

原 二百七十三

姓纂周文王第十六子原侯之後封在河內子孫氏
馬周有原莊公襄公原伯魯畿內諸侯也魯人原壤
陳有原仲晉有原軫亦為原氏也 魯郡兗州今有
原氏仲尼弟子原憲之後

左傳桓公五年王以諸侯伐鄭鄭原繁以中軍奉公為
魚麗之陳

僖公二十八年晉原軫將中軍胥臣佐下軍上德也

宣公十二年晉原穀宋華椒同盟於清丘


史記原憲字子思問恥於孔子 克伐怨欲不行焉

家語曰原憲衣弊衣冠衍然有自得之志子貢曰如之
何病也憲曰吾聞無財者之謂貧學道不能行之謂
病吾貧也非病也

原亢籍孔子弟子家語曰名抗字籍

前漢游俠原涉字巨先父為南陽太守死官賦歛送葬

皆千萬以上涉讓還之行喪家廬墓三年由是顯名
京師扶風謁請為議曹衣冠慕之輻湊舉能治劇
為谷口令谷口聞其名不言而治



名賢氏族言行類稿卷十三

欽定四庫全書

子部

名賢氏族言行類稿卷十四

五四

詳校官典籍臣潘奕雋

主事臣祁韻士覆勘

總校官進士臣朱 銓

校對官主事臣馮 培

謄錄監生臣徐鳳翔

欽定四庫全書

名賢氏族言行類稿卷十四

宋 章定 撰

孫 二百七十四

姓纂周文王第八子康叔封於衛至武公子惠孫魯

耳為衛上卿因氏焉

左傳桓公七年衛使孫良夫來盟始通且謀會晉也

襄公二十六年孫文子在戚孫嘉聘於齊孫襄居守六

月公會于澶淵以討衛疆戚田取衛西鄙懿氏六十
以與孫氏

新序孫叔敖見兩頭蛇殺而埋之歸曰聞見兩頭蛇者
死恐他人見之殺而埋之矣其母曰有恩德者天報
以福長為楚令尹未治而國人信其仁也 虞丘子
辭位而進孫叔敖叔敖相楚莊王卒以伯

史記孫武子者齊人也斬吳王愛姬以行軍法 闔廬
以為將西破強楚入郢北威齊晉顯名諸侯孫子與

有力焉 著兵法十三篇

孫臏孫武之後齊威王問兵法遂以為師 用減竈之
法以破魏軍殺龐涓以此名顯天下世傳其兵法
循吏孫叔敖楚之處士為楚相三得相不喜三去相不
悔

前漢孫寶字子嚴潁川鄆陵人御史大夫張忠辟為屬
欲令授子經寶自劾去後署寶主簿寶徙舍祭竈請
比隣忠使問寶今兩府高士俗不為主簿子甚悅何

也寶曰高士不為主簿而大夫若以寶為可一府莫
言非也安得獨自高忠慚薦寶經明質直宜備近臣
為諫大夫

後漢孫期字仲或少習易尚書 事母至孝里落化其
仁讓 黃巾賊過期里陌相約不犯孫先生舍

孫堪字子穉明經學有志操一毫未嘗取於人以節介
氣勇自行仕郡縣公正廉潔奉祿不及妻子

魏志孫禮字德達凡臨七郡五州皆有威信 後為司

隸校尉遷司空

蜀志孫乾字公祐為秉忠將軍 雍容風議見禮於世

吳志孫堅字文臺子策字伯符 權字仲謀 權少子

亮字子明 休字子烈 皓字元宗權之孫也 登

字子高 慮字子智 和字子孝 霸字子威 奮

字子揚

晉書孫鑠字巨鄰為尚書郎在職駁議十有餘事為當

時所稱

孫楚字子荆才藻卓絕爽邁不羣遷佐著作郎為馮

翊太守少時欲隱居漱石枕流三子衆洵纂纂

子統綽並知名統字承公為鄆令綽字興公作

天台賦擲地作金石聲與習鑿齒共行綽在前曰沙

之汰之瓦石在後鑿齒曰簸之颶之糠粃在前除

著作佐郎太學博士轉永嘉太守又為廷尉卿少

以文才垂稱文士綽為其冠統綽棣華秀發名顯

中興

孫旂字伯旂察孝廉累遷為兗州刺史弟尹字文旂

歷陳留陽平太守

孫惠字德施口訥好學有才識東海王越以為軍諮祭酒每造書檄或驛馬催之應命立成皆有文采

孫盛字安國起家佐著作郎以家貧親老求為小邑出補瀏陽令轉參軍補長沙太守頗營資貨部從事察知服其高名而不劾之

孫晷字文度每獨處幽闇之中容止瞻望未嘗傾邪聞

人之善欣若有得見人饑寒並周贍之

隱逸孫登字公和好讀易撫一絃琴見者皆親樂之

虞潭母孫氏恭順貞和甚有婦德夫亡誓不改節潭始

自幼童便訓以忠義諡曰定夫人

南史孫惠素仕齊為少府卿性至孝吏才疆濟而臨

事清刻

孫慶字季高盧循之難武帝曰非卿不能破其窟穴即

遣季高汎海襲番禺拔之

孫瑒字德璉少儻好謀畧歷祠部尚書陳後主頻幸
其宅賦詩述勲德之美 事親以孝聞 有財散之
親友及卒後主為題銘後四十字時論以為榮

孫謙字長遜東莞人為句容令清慎彊記縣人號為神
明齊初為錢唐令御煩以簡獄無繫囚 為零陵太
守年已衰老猶強力為政吏人安之 為郡縣常勤
勸課農桑務盡地利 從子廉字思約便辟巧宦為
晉吳興太守處官平直以善政稱武帝嘗曰東莞二

孫謙廉而已

孫抱為延陵令善吏職高爽詣之了無故人之懷高爽
取筆書縣鼓云徒有八尺圍腹無一寸腸面皮如許
厚受打詎未央

文學孫詵字休羣愛文尤賞泉石卒御史中丞

孝義孫法宗吳興人也 又孫棘彭城人也

孝義孫淡事母至孝母疾不眠食以差為期 齊時蠲

表門閭

北史孫紹字世慶仕魏為中書侍郎性抗直每上封事
常至懇切不憚犯忤

孫騰字龍雀少質直明解吏事 齊神武引置魏朝寄

以心腹 位至太傅

孫搴字彥舉齊神武命作檄文援筆立就其文甚美神
武大悅即署相府主簿專典文筆及卒神武曰折吾
右臂

孫惠蔚舉孝廉對策為中書博士後為著作郎才非文

史無所撰著遷國子祭酒祕書監 魏初儒生寒宦

惠蔚最為顯達

孫靈暉三禮三傳皆通宗旨 舉秀才射策高第仕齊

至國子博士 子萬壽字仙期博涉經史善屬文

卒大理司直

節義孫道登彭城人為梁將韋休所虜不屈

唐孫伏伽貝州人武德初上言三事帝大悅即詔周隋
之晚忠臣結舌伏伽至誠慷慨據義懇切以伏伽為

治書侍御史初帝受禪伏伽最先諫帝語裴寂曰若
李綱孫伏伽可謂誼臣矣 太宗數馳射伏伽諫曰走
馬射帖非所以導養聖躬帝悅 遷大理卿 始拜
御史時制未出歸卧於家無喜色頃之御史造門子
弟驚白伏伽徐起見之時人稱其有量

孫揆字聖圭第進士昭宗討李克用以揆為昭義軍節
度使

孫思邈京兆人通百家說善言老子莊周獨孤信異之

曰聖童也顧器大難為用爾及長居太白山隋文帝召
不拜密語人曰後五十年有聖人出吾且助之太宗
初召詣京師官之不受固辭上元元年稱疾還山
思邈善陰陽推步醫藥

孫逖博州人屬思警敏年十五見崔日用令賦土火爐
援筆成篇理趣不凡日用駭歎遂與定交舉手筆
俊拔哲人奇士隱淪屠釣及文藻宏麗科又舉賢良
方正為集賢院修撰典詔誥為代言尤精密張九

齡視其草欲易一字卒不能也

五代孫晟初名鳳又名忌密州人也好學有文辭尤長於詩少為道士居廬山簡寂宮嘗畫唐詩人賈島像置於屋壁晨夕事之簡寂道士惡晟以為妖驅出之乃儒服北之趙魏謁莊宗於鎮州莊宗以晟為著作佐郎天成中奔吳李昇喜其文辭使為教令由是知名晟為人口吃遇人不能道寒暄已而坐定談辯鋒生聽者忘倦昇尤愛之以為右僕射家益富驕每食

不設几案使衆妓各執一器環立而侍號肉臺盤時人多效之周世宗征淮李景遣王崇質副晟奉表議和世宗還崇質而留晟館於都亭驛待之甚厚已而周兵數敗盡失所得諸州世宗憂之召晟問江南事晟不對世宗怒收晟下獄殺之晟臨死世宗猶遣近臣問之晟終不對神色怡然正其衣冠南望而拜曰臣惟以死報國爾乃就刑其後世宗怒解憐晟忠甚悔之

孫方諫鄭州清苑人也率其徒入狼山為砦漢高祖起
契丹縱火燒定州虜其人民北去方諫聞之自狼山
入據之以歸漢高祖嘉之即拜方諫義武軍節度使
周太祖時徙鎮鎮國以其弟行友為定州留後世宗
攻太原方諫朝於行在從還至洛卒贈太師

宋朝孫奭字宗古博平人也幼好學徙居鄆之項城舉
九經及第為莒縣簿改大理評事為國子監直講太
宗幸國子監奭講尚書說命太宗甚悅真宗即位為

諸王府直講校正九經正義除龍圖閣待制奭以經術進未嘗阿附取悅真宗嘗問以天書奭曰臣愚所聞天何言哉豈有書也真宗知其忠每容之真宗命向敏中諭奭令陳朝廷得失奭上納諫恕直輕徭薄歛四事真宗頗施用其言出知河陽及朱能獻乾祐天書奭復上疏曰昔漢文成將軍以帛書飯牛陽言牛腹中有奇書殺視得書天子識其手迹斬之後有五利將軍妄自言多方不讎坐誅漢武以能誅

文成五利前史謂之雄材先帝時有侯莫陳利用者
始以方術暴得寵用一旦發其姦誅于鄭州至今輿
誦謂之英斷唐明皇得靈寶符上清護國經寶券等
皆王鉷田同秀等所為明皇不能顯誅誅於邪說曲
奉鬼神過崇妖妄今日見老子閣上明日見老子山
中大臣尸祿以將迎端士畏威而緘默既惑左道即
紊正經民心用離勢不復振暨祿山兆亂輔國却遷
老子寧肯禦兵寶符安能排難身危名辱為千古所

笑今朱能所為頗類王鉞等臣願陛下遠思漢武之
雄材近法先帝之英斷中鑒明皇之召禍庶幾災害
不生禍亂不作享萬世無疆之休入為給事中以父
年高乞侍養得知兗州召還為翰林侍讀學士父喪
去官詔起復兼龍圖閣學士每講論上前至前世亂
君亡國之際志在規諷必反復言之嘗畫無逸圖以
進請設便坐以老請致仕復知兗州拜禮部尚書
以太子少傅致仕疾甚徙正寢屏侍妾曰無令我死

婦人之手卒諡宣爽性方重事親至篤孝父亡舐其面以代頰 子瑜官至天章閣待制

孫何字漢公蔡州汝陽人也幼嗜學與丁謂齊名王禹偁尤知之以為自唐韓柳後三百年有孫丁也時人謂之孫丁舉進士開封禮部殿試俱第一通判陝州召入直史館遷祕書丞歷右正言改右司諫尋出為京東兩浙轉運使何辨急頗事苛察日有捶楚州縣之吏患之乃求古碑字磨滅者紙本揭之館中何至

則讀其碑辨識文字以爪搔髮垢而嗅之遂往往至暮不復省錄文案故從者依憑其威妄為寒暑所至騷然加起居舍人景德初知制誥卒弟僅

孫僅字隣幾與何俱有名於時兄弟皆以進士冠天下士學者榮之初為舒州推官復舉賢良方正科策入等授光祿寺丞直集賢院景德初拜太子中允為開封府判官擢右正言知制誥會永興擇守宰相以僅為諳練民政乃命之然僅純厚長者治郡非所長也

拜右諫議大夫集賢院學士知開封府出知河中
遷給事中卒

孫甫字之翰許州陽翟人也舉進士嘗從杜衍辟永興
軍司錄行為樞密副使又薦之得秘閣校理是時諸
將討元昊久無功天下騷動仁宗方銳意更用二三大
臣乃極選一時知名士增置諫員以甫為右正言

後直史館知陝州徙晉州為河東轉運使擢天章閣
待制河北都轉運使不行留侍讀卒甫性勁果美

談論每言唐君臣行事以推見當時治亂若身履其間而聽者曉然如目見云

孫抃字夢得眉州眉山人也六世祖長孺喜藏書為樓而置其上蜀人謂之書樓孫氏中進士甲科通判絳州召試遷直集賢院累擢右正言知制誥翰林學士升祔二后於太廟抃為敕文有曰嗟乎為天下之母育天下之君不逮乎九重之承顏不及乎四海之致養念言一至追慕增結仁宗覽之泣下謂抃曰卿何

以得道朕心中事抃曰臣少以庶子不齒於兄弟不
及養母以此知陛下聖心中事仁宗為之流涕 抃
前後多引薦士大夫久居侍從泊如也人以為長者
仁宗欲用耆老以抃為樞密遷叅政抃年益高於
事無所可否後以太子少傅致仕卒諡文懿

孫固字和父鄭州管城人也舉進士稍遷祕書丞宰相
韓琦深知之神宗為潁王以固侍講王府東宮建為
太子侍讀神宗即位擢工部郎中遷右諫議大夫龍

圖閣直學士元豐元年擢拜同知樞密謀者告夏人
幽其主神宗遽欲西討固諫曰舉兵易解禍難前後
論之甚苦神宗意堅甚固曰必不得已請聲其罪薄
伐之分裂其地使其酋長自守神宗笑曰此真酈生
之說爾時執政有議直渡河者固曰然則孰為陛下
任之者神宗曰吾以屬李憲固曰西伐大事也豈可
使宦者為之令陛下任李憲則士大夫孰肯為用乎
神宗不悅他日固又言曰今五路進師而無大帥就

使成功其必為亂神宗曰大帥誠難其人呂公著曰
既無其人曷若已之固曰公著言是也其後師果無
功神宗始悔不用固言元祐二年除侍讀遂除知樞
密院事五年卒諡溫靖

孫永字曼叔趙郡人也年十歲而孤以祖冲蔭為將作
簿舉進士治平三年賴王出閣永以選為侍讀明年
建儲為太子舍人神宗即位為天章閣待制歷河
北陝西都轉運使時以邊用不足以解鹽市馬別為

一司外臺不得與永奏曰鹽馬國之大計使主者專其柄既無以統隸苟為非法孰從而制之 知瀛州

河決貝州瀛冀諸州尤被患而民租以災傷倚閭者督斂如故永具以聞詔從其請仍命發廩粟以賑之 哲宗即位拜工書除吏書卒謚康簡

孫洙字巨源廣陵人也年十九舉進士調秀州司戶叅軍於潛令包拯歐陽修舉洙賢良方正洙上策論五十篇善言祖宗事指切治體推往較今分辯得失抑

揚條鬯讀之令人感動歎息韓琦見而奇之曰今之
賈誼也編校祕閣書籍遷館閣校勘治平末京師大
雨水詔求直言洙上疏言時弊七事要務十五事多
可施行者為史館檢討同知諫院兼直舍人院乞增
置諫官以廣言路王安石以論青苗事多逐諫官御
史洙鬱鬱不能有所言懇求補外得知海州入為同
修起居注知制誥直學士院神宗稱其學術以為翰
林學士且大用矣逾月而卒洙博學多智進退整

暇道古今事有條理魏漢以來書記其文可道者皆成誦云

孫覺字莘老高郵人也中進士第治平中為館閣校勘神宗即位除集賢院為昌王府記室王禮之問終身之戒覺為陳諸侯之孝作富貴箴遷右正言青苗法行覺論其非時言者亦以為畿內有追呼抑配之擾神宗令覺行視虛實退而上疏曰臣以言為職體量非臣事黜知廣德軍踰年徙湖州松江隄為民

患覺易以石高一尋有奇長百餘里隄下悉為良田
徙廬州改右司諫以祖母亡解官下太常議議者謂
不可詔知潤州而覺已持祖母喪矣服除知蘇州徙
福州召為太常少卿易祕書少監 哲宗即位兼侍
講遷諫議又遷給事為吏侍擢拜中丞以疾請罷留
侍講力請外卒 與東坡遊唱和極多 弟覽

孫覽字傳師舉進士後知尉氏縣將官御下苛酷士卒
謀就大閱殺將以叛覽聞之亟往喻之曰將官暴虐

誠有罪也然汝曹衣食縣官縣顧負汝耶何敢為族
減計衆皆感悟聽命遂帖服神宗嘉之以為司農寺
主簿出為湖南提舉京西轉運召為右司除河北轉
運又帥延安進樞密直 覽治邊數有功而議事多
與執政異坐軍期落職俄復待制知光州徙河南復
龍學知渭州徙永興成都請祠卒 覽精於吏事甚
有能政所至善良得職云

孫傳字伯野海州人也舉進士擢中書舍人高麗入貢

傳言所貢於中國無絲毫之益宰相以其所論略與
蘇軾同奏貶蘄州安置靖康元年召拜給事中兼侍
讀進兵書傳嘗上章乞復祖宗法度欽宗問之傳曰
祖宗法惠民熙封法惠國崇觀以來法惠姦時謂名
言拜尚書右丞俄除同知樞密院事

孫復字明復晉州平陽人也舉進士不中居太山之陽
學春秋著尊王發微魯多學者自石介而下皆以弟
子事之復年四十家貧不娶丞相李迪以弟之子妻之

范仲淹富弼言其道德經術宜在朝廷召拜校書郎
國子直講卒 仁宗命其門人祖無擇就其家錄其
書十有五篇藏於秘閣云

溫二百七十五

姓纂唐叔虞之後晉公族受封河內之溫因以命氏
又鄰至食采於溫亦號溫季漢功臣表溫疥封櫟侯
櫟音苟疥孫何始居太原

後漢獨行溫序字次房光武時遷護羌校尉

魏志溫恢字曼基舉孝廉為廩丘長廣川令所在見稱
為揚州刺史太祖曰甚欲使卿在親近顧以為不如
此州事大又遷涼州刺史

晉書溫羨字長卿兄弟六人並知名於世號曰六龍
轉吏部尚書

溫嶠字太真博學能屬文風儀秀整累遷為中書令有
棟梁之任鎮武昌甚有惠政 預密謀拒王敦

北史文苑溫子昇字鵬舉博覽百家文章清婉常景曰

溫生是大才士 孝莊以為主客郎中 文章陵顏

轅謝含任吐沈

任謂
任昉

唐溫大雅字彥弘并州祁人性至孝與弟彥博大有皆
知名薛道衡見之歎曰三人者皆卿相才也高祖兵
興主文檄受禪討定儀典遷黃門侍郎而彥博為中書
侍郎對管華近帝嘗曰我起晉陽為卿一門耳

溫彥博字大臨通書記警悟而辯善辭令每問四方風
俗臚布誥命若成誦然進止詳華人皆拭目觀性

周慎既掌機務謝賓客不通進見必陳政事利害

溫大有字彥將攝大將軍府記室

溫佺大雅四世孫字輔國以字行安祿山亂往見平原太守顏真卿助為守計李光弼厚遇之後居鄴薛嵩薦之朝授太常丞一謝嵩即去屏處郊野世推其高節

子造

溫造字簡與性嗜書少所降屈不喜為吏隱王屋山人號其居曰處士墅張建封聞名書牋招禮及去造謝

歸下邳慨然有高世心 李希烈反德宗患之詔建
封擇士往說劉濟建封疆署造節度叅謀使幽州造
與濟語未訖濟俯伏曰僻陋不知天子神聖大臣盡
忠願率先諸侯効死節建封以聞天子愛其才問造
家世及年對曰臣五世祖大雅外五世祖李勣臣犬
馬之齒三十有二帝奇之復隱東都烏重胤奏致幕
府 長慶初為太原幽鎮宣諭使至范陽劉總橐鞬
郊迎造為開示禍福總懼矍然若兵在頸由是籍所

部九州入朝遷御史出為朗州刺史開後鄉渠百里
溉田二千頃民獲其利號右史渠再授侍御史彈奏
李祐拜大金吾違詔進馬造正衙抨劾祐曰吾夜入
蔡州擒吳元濟未嘗心動今日膽落於溫御史造
彈擊無回畏威望隱然發南曹偽官九十人興元
軍亂殺李絳衆謂造可夷其亂文宗亦以為能乃授
山南西道節度使許以便宜從事遂平之奏復懷
州古秦渠枋口堰以溉濟源河內溫武陟四縣田五

千頃名為御史大夫子璋

溫璋以父蔭累官大理丞歷京兆尹素強幹鉏宿弊豪
右帽服 同昌公主薨上誅醫無狀者繫屬三百餘
人璋極諫貶振州司馬

溫廷筠彥博裔孫少敏悟工為辭章與李商隱皆有名
號溫李 大中末試有司廉視尤謹廷筠不樂上書
千餘言然私占授者已八人授方山尉 廷筠弟廷
皓咸通中署徐州觀察使崔彥曾幕府不與龐勛草

表求節度使 贈兵部郎中

宋朝溫仲舒字秉陽河南人也舉進士為大理評事通判吉州淳化二年為樞密四年召為叅政謚恭肅仲舒有應務才與寇準同進人謂之溫寇呂蒙正為相嘗援進仲舒及用乃反攻蒙正

溫益字禹弼泉州人也舉進士知福州移潭州入為太常少卿除給事中兼侍讀於是左正言陳瓘論益守潭日鄒浩貶新州道其郡投宿僧寺益差兵卒逼浩

登舟使冒風濤夜渡范純臣劉奉世韓川呂希純呂陶皆
貶湖南並為益所侵困當時大臣以為是而天下以為非陛
以此察之則益之為人可知矣今豈當為給事中哉遂以
龍圖閣待制知開封府崇寧初遷中書侍郎卒

關二百七十六

園二百七十七

四皓園公之後風俗通云姓於所居城郭園地是也

滾

音表

二百七十八

何氏纂要云人姓

軒 二百七十九

風俗通云軒轅氏之後漢有諫議大夫軒和

尊 二百八十

古尊盧氏之後

罇 二百八十一

見纂要文

敦 二百八十二

陳留風俗傳敦氏姑姓之後急就章有敦倚一云秦
文公時史敦後也

賁 二百八十三

縣賁父之後風俗通魯有賁浦 汝南漢有郎中賁
光見論衡晉書汝南賁嵩清操之士又庾琛女適汝
南賁氏又長水校尉賁顗

門 二百八十四

莊子有門其 河南官氏志吐門氏改為門氏

恩 二百八十五

見姓苑風俗通云陳大夫成仲不恩之後

盆 二百八十六

見姓苑齊郡漢盆為郎中將

屯 二百八十七

姓苑云渾沌氏之後去水為屯漢有常山太守屯莫
巴郡後蜀法部尚書屯度

根 二百八十八

根牟子六國時著書見風俗通

昆 二百八十九

夏諸侯昆吾之後齊有昆辨見戰國策

渾 牛坤 二百九十
反

見纂要文

名賢氏族言行類稿卷十四

欽定四庫全書

名賢氏族言行類稿卷十五

宋 章定 撰

韓 二百九十一

姓纂出自唐叔虞之後曲沃桓叔之子萬食邑於韓
因以為氏代為晉卿後分晉為國韓為秦滅復以國
為氏也出潁川後韓騫避王莽亂移居南陽故有潁
川南陽二望

左傳桓公三年曲沃武公伐翼韓萬御戎逐翼侯於汾隰夜獲之

襄公十六年晉平公即位韓襄為公族大夫改服修官烝於曲沃

襄公二十六年韓宣子聘於周王曰韓氏其昌阜於晉乎

昭公二年晉侯使韓起來聘觀書於太史氏見易象與魯春秋曰周禮盡在魯矣

昭公二十八年晉魏獻子為政分祁氏之田以為七縣
以韓固為馬首大夫謂能守業者也

宣公十二年晉師救鄭韓穿為上軍大夫

成公十八年晉悼公即位以韓無忌為公族大夫使訓
卿之子弟共儉孝弟

說苑晉趙盾舉韓厥晉君以為中軍尉

史記韓非韓之諸公子也喜刑名法術之學而歸本於
黃老為人口吃不能道說而善著書 作孤憤五蠹

內外儲說林說難十餘萬言

韓說兩為將軍封龍頌侯

儒林韓生名嬰燕人文帝時為博士推詩之意為內外
傳數萬言燕趙間言詩者由韓生

前漢韓王信漢二年立為韓王

韓信淮陰人寄食漂母受辱胯下 數與蕭何語何奇

之曰諸將易得如信國士無雙 設壇拜將 出背

水陣以破趙 拔趙旗幟立漢幟 次囊沙而殺龍

且羞與絳灌等列對上曰陛下不過能將十萬如
臣多多益善耳連百萬之衆戰必勝攻必取人
傑

韓安國字長孺梁成安人事梁孝王為中大夫後抵

罪獄吏田甲辱之安國曰死灰獨不復然乎武帝

拜為御史大夫與王恢辯議和親所舉皆天下

名士天子以為國器徙為才官將軍材器有並

於公家

王嘉傳

首鼠兩端

灌夫傳

韓延壽字長公燕人為諫議大夫遷淮陽太守治甚有
名所至必聘賢士吏無追捕之苦民無箠楚之
憂入守左馮翊不肯行縣恐重煩擾有昆弟訟田
延壽大傷之閉閤思過兩昆弟自悔皆肉袒謝終死
不敢復爭孫威至將軍亦多恩信得士死力

後漢韓歆字翁君南陽人封扶陽侯好直言無隱諱嘗
證歲將饑凶指天畫地言甚剛切

韓棱字伯師五遷為尚書令肅宗賜以寶劍自署其名

曰韓稜之龍淵以其淵深有謀故也遷南陽太守特聽過家上冢鄉里以為榮

韓韶字仲黃潁川人為羸長賊聞其賢相戒不入境餘縣遷流入界者甚衆愍其饑困開倉賑之所稟贍萬餘戶主者爭不可韶曰長活溝壑之人以此伏罪含笑入地矣

逸民韓康字伯休賣藥於長安市口不二價公車連徵不至

方術韓說字叔儒善圖緯之學言日食火災皆驗

魏志韓暨字公至遷太常崇明正禮廢去淫祀多所匡
正在官八年以疾遜位詔曰暨澡身浴德志節高潔
年踰八十守道彌固可謂純篤老而益幼者也以為
司徒處以靜居行化出以任職流稱

吳志韓當字義公累遷將軍加都督江表之虎臣也
晉書韓伯字康伯留心文藝能自標置居然是出羣之
器勝氣籠霄飛談卷霧轉吏部尚書子璿官至

衡陽太守

韓階長沙人廉謹篤慎為閭里所敬愛見忠義傳

隱逸韓績字興齊少好文學以潛退為操東土並宗敬為召拜博士稱病不起

載記韓恒字景山張載奇之曰王佐才也博覽經籍無所不通慕容雋時為揚烈將軍後傳東宮從太子入廟雋顧謂左右曰此一代偉人未易繼也

韓子高仕陳除右軍將軍

南史孝義韓係伯事父母謹孝齊時蠲表門閭

孝義韓懷明上黨人父喪負土成墳母終號哭不絕聲
有白鳩巢其廬

北史韓延之字顯宗仕晉位建威將軍仕魏為武牢鎮
將

韓秀字白武文成稱秀聰敏清辨才任喉舌遂命出納
王言并掌機密子務性端謹有吏幹為郢州刺史
韓茂字元興仕魏初為虎賁郎將終於侍中為將善於

撫衆勇冠當世為朝廷所稱 均字天德有將畧歷

定青冀三州刺史

韓麒麟孝文時拜齊州刺史在官寡於刑罰立性恭慎
恒置律令於坐旁 子顯宗字茂親舉秀才對策甲
科除著作佐郎

韓賢字普賢壯健有武用齊神武起拜建州刺史

韓軌字伯年齊神武起贊成大策遷秦州刺史甚得邊
和神武巡秦州欲以軌還仍賜人戶絹布兩匹州人

七千戶皆辭不受惟乞留軌 以勲庸歷登台鉉常
以謙恭自處不以富貴驕人 子晉明諸勲貴子孫
中最留心學問好酒朝廷欲處之貴要地必以疾辭
告人云廢人飲美酒對名勝安能作刀筆吏披反故
紙乎

韓果字阿六拔破稽胡於北山稽胡憚其勁勇趨捷號
為著趯人

韓褒字弘業好學而不守章句位驃騎大將軍儀同三

司

韓雄字木蘭有將率材畧慷慨有立功之志仕周進驃
騎大將軍子禽字子通少慷慨以膽畧稱有雄傑
之表隋文拜為廬州總管為先鋒伐陳及平金陵
詔曰以名臣之功成太平之業申國威於萬里宣朝
化於一隅高名塞於宇宙盛業光於天壤

唐韓瑗字伯玉京兆人少負節行博學曉吏事永徽三
年同中書門下三品監修國史王后之廢瑗雪泣

諫云云褚遂良貶潭州瑗上言願寬遂良罪不聽自表歸田里

韓仲良瑗之父武德初興定律令清崇寬簡以示惟新終刑部尚書

韓思彥字英遠鄧州人舉下筆成章志烈秋霜科擢第授監察御史常言當世得失高宗加二階待詔洪文館巡察劍南益州高貲兄弟相訟累年不決思彥敕厨宰飲以乳二人寤泣曰吾乃夷獠不識孝義公將

以兄弟共乳而生邪請輟訟會蜀大饑開倉賑民然
後以聞璽書褒美後太白晝見勸帝修德荅天譴
至官閱月自免去放跡江湖間久之補建州司戶
叅軍帝召為御史罷客汴州張僧徹者廬墓三十
年詔表其閭請思彥為頌餉縑二百不受僧徹固請
為受一匹命其家曰此孝子縑不可輕用

韓琬字茂真落魄少崖檢有姻勸舉茂才名動里中刺
史行鄉飲餞之主人揚解曰孝於家忠於國今始充

賦請行無算爵儒林榮之 景雲初上書言事出監
河北軍兼按察使先天中賦絹非時於是穀賤黠貴
丁別二縑人多徙亡琬曰御史乃耳目官知而不言
尚何賴又上言須報則弊已甚移檄罷督乃聞詔可
韓思復字紹出京兆人舉秀才高第家窶歲饑杜瑾以
百綾餉思復思復方併日食而綾完封不發調梁府
倉曹叅軍會大旱輒開倉賑民州劾責對曰人窮則
濫不如因而活之轉汴州司戶仁恕不行鞭罰遷

滁州刺史有黃芝五生州署民為刻頌其祥 開元
初為諫議大夫山東大蝗宰相姚崇遣使分道捕瘞
思復言天災流行庸可盡瘞望陛下悔過責躬其驅
蝗使一切宜罷玄宗然之遷御史大夫性恬淡不喜
為繩察卒天子親題其碑曰有唐忠孝韓長山之墓
子朝宗孫欽皆仕宦有名

韓休京兆人工文辭舉賢良玄宗在東宮令條對國政
中乙科出為虢州刺史 侍中裴光庭卒帝敕蕭嵩

舉所以代者稱休志行遂拜黃門侍郎同平章事休
直方不務進趨既為相天下翕然宜之請治程伯
獻貪僭罪帝不許固爭曰陛下不出伯獻臣不敢奉
詔帝不能奪大率堅正類如此宋璟曰休仁者之勇
休峭鯁時政所得失言之未嘗不盡帝嘗獵或張
樂必視左右曰韓休知否已而疏輒至引鑑不樂左
右曰自韓休入朝陛下無一日歡何不逐去之帝曰
吾雖瘠天下肥吾用休社稷計耳

韓滉休之子字太冲以蔭補三遷吏部員外郎性強直
明吏事莅南曹五年簿最詳緻以戶部侍郎判度支
為鎮海軍節度使綏輯百姓不踰年境內稱治李
希烈陷汴州滉遣王栖耀等破走之漕路無梗完靖
東南滉功多時里胥有罪輒殺無貸人怪之滉曰此
輩皆鄉縣豪黠不如殺之用年少者惜身保家不為
惡聞京都未平乃築石頭五城以為朝廷有永嘉
南走事然滉握強兵而調發糧帛以濟朝廷者絀屬

時實賴之貞元元年檢校左僕射同平章事性節儉
衣裘茵社十年一易居處陋薄門當列戟以父時第
門不忍壞乃不請居重位清潔好鼓琴書得張旭
筆法畫與宗人韓相埒嘗言不能定筆不可論書畫
幼時有美名所與遊皆天下豪俊初判度支李晟以
裨將白軍事滉待之加禮後晟終立大功

韓臯滉之子字仲聞資質重厚有大臣器策賢良方正
異等入拜尚書右丞貌類父既孤不復視鑑生知音

律常曰長年後不願聽樂以門內事多逆知之聞鼓
琴至止息歎曰美哉嵇康之為是曲其當晉魏之際
乎其音主商商為秋秋者天將搖落肅殺其歲之晏
乎晉乘金運商又金聲此所以知魏方季而晉將代
也緩其商絃與宮同音臣奪君之義知司馬氏之將
篡也王淩母丘儉文欽諸葛誕繼為揚州都督咸有
興復之謀皆為司馬懿父子所殺康以揚州故廣陵
地陵等皆魏大臣故名其曲曰廣陵散言魏散亡自

廣陵始止息者晉雖暴興終止息於此其哀憤躁蹙
惜痛迫脅之音盡於是矣永嘉之亂其兆乎

韓洄字幼深滉之弟劉晏表為屯田員外郎晏罷乃擢
洄戶部侍郎判度支上言請罷江淮七監又言天下
銅鐵冶乃山澤利當歸王者積米長安萬年二縣各
數十萬石視年豐耗而發歛焉故人不艱食

韓游瓌靈州人始為郭子儀裨將祿山反誘河曲九蕃
府六胡叛部落五十萬子儀使游瓌擊破之進邠寧

節度使奉天之狩兵未集游瓌以兵三千來赴難功
第一 李懷光叛誘為變游瓌白發其書帝曰卿可
謂忠義矣破朱泚咸陽京師平論功第一 吐蕃請
修清水盟以歸侵地詔問游瓌荅曰西戎弱則請盟
彊則入寇今侵地益深而乞盟詐我也帝不從會盟
平涼游瓌以勁騎五百待非常賊被刼馳以免虜見
兵出即解去

韓弘清州人舉明經不中學騎射貞元十五年充宣武

節度使汴軍驕不可制弘察素恣橫者三百人一日數其罪斬之自是無敢肆者拜中書令為人莊重寡言沈謀勇斷齊蔡平而後請覲天子尊寵異等子公武為執金吾性恭遜不以富貴自處

韓充弘之弟依舅李元元嘗謂賓佐曰充後當貴諸君必善事之擢金吾衛將軍斥軍士虛名不如令者七百人穆宗立為義成軍節度使會汴軍逐李愿以李察主留事帝謂充素為汴士悅向詔節度宣武兼統

義成兵討宥戰破之遂入汴馳至城下汴人望見充歡躍無復貳者始帝遣人問破賊期充對汴天下咽喉一月可破方二旬即克帝喜曰充料敵若神内外按堵汴人賴之充雖將家性儉節歷三鎮居處服玩如儒生乘機決策無餘悔世推善將

韓朝宗李白與之書云生不用封萬戶侯但願一識韓
荊州

韓愈字退之鄧州人生三歲而孤讀書日記數千百言

通六經百家學擢進士第操行堅正鯁言無所忌

遷監察御史上疏極論宮市德宗怒貶陽山令有愛在

民民生子多以其姓字之 元和初權知國子博士

既才高數黜乃作進學解以自諭執政覽之竒其才

改比部郎中史館修撰轉考功知制誥進中書舍人

初憲宗將平蔡命裴度使諸軍及還具言賊可滅與

宰相議不合愈奏言平蔡在斷與不斷耳度奏愈行

軍司馬元濟平遷刑部侍郎 憲宗遣使者往鳳翔

迎佛骨入禁中愈表言之帝怒將抵死裴度諫曰愈
言許牘內懷至忠願少寬假乃貶潮州既至潮以表
哀謝帝得表頗感悔欲復用皇甫鎛忌乃移袁州刺
史初愈至潮問民疾苦皆曰惡溪有鱷魚食民畜
產且盡民以是窮數日愈自往視之令其屬以一羊
一豚投溪水而祝之一夕暴風震電起溪中數日水
盡涸西徙六十里自是潮無鱷魚之患 召拜國子
祭酒轉兵部侍郎鎮州亂殺田洪正而立王廷湊詔

愈宣撫既行衆危之愈至廷湊嚴兵迓之愈大聲曰
天子以公為有將帥才故賜以節豈意同賊反耶愈
歸奏其語帝大悅轉吏部侍郎為京兆尹 性明銳
不詭隨與人交終始不少變成就後進士往往知名
皆稱韓門弟子凡內外親若交友無後者為嫁遣孤
女而卹其家 每言文章自漢司馬相如太史公劉
向揚雄後作者不出世故愈深探本原卓然樹立成
一家言其原道原性師說等數十篇皆與衍閣深與

孟軻揚雄相表裏而佐佑六經云至他文造端置辭
要為不蹈襲前人者然惟愈為之沛然若有餘至其
徒李翱皇甫湜從而效之遽不及遠甚從愈游者若
孟郊張籍亦皆自名於時

韓偓字致光京兆人擢進士第偓嘗與崔胤定策誅劉
季述昭宗反正為功臣為中書舍人其後韓全誨等
劫帝西幸偓夜追及鄠見帝慟哭至鳳翔遷兵侍天
祐二年挈其族依王審知云 帝疾宦人驕橫欲盡

去之倖曰云云帝前膝曰此事始終屬卿倖薦御史大夫趙崇勁正雅重可以準繩中外帝知倖崇門生也歎其能讓宰相韋貽範母喪詔還位倖當草制上言貽範處喪未數月使視事傷孝子心學士使馬從皓逼倖求草倖曰腕可斷麻不可草帝欲相者三四讓不敢當

韓翃唐德宗時制誥闕人上批曰與韓翃時有與翃同姓名者為江淮刺史又具二人同進上復批曰春城

無處不飛花寒食東風御柳斜日暮漢宮傳蠟燭青
烟散入五侯家與此韓翃

五代韓建字佐時許州長社人少從楊復光攻黃巢於
長安建等無所屬乃以麾下兵西迎僖宗於蜀僖宗
還為華州刺史是時天下已亂諸鎮皆武夫獨建撫
輯兵民又好學荆南成汭時冒姓郭亦善輯荆楚當
時號為北韓南郭

韓遜不知其世家梁開平三年封朔方節度使善撫其

部部人皆愛之為遜立生祠

宋朝韓令坤磁州武安人也世宗征太原以令坤為都校以功拜武定軍節度使世宗伐淮甸揚州將吏聞周師至開門以迎之令坤整衆而入市不易肆人甚悅國初移鎮天平改成德卒追封南陽郡王

韓重贇磁州武安人也國初以重贇有翊戴之功後領

即真定韓氏忠憲公家也忠憲諸子名連系字康公兄弟也生宗字宗之下從玉玉之下從日日之下

從元元之下從水
世謂桐樹韓家

韓絳字子華少力學舉進士甲科通判陳州尋同知太常禮院故事享太廟百官前期習儀廟中絳言其非禮遂徙就尚書省 召試知制誥故事郊祀天子親閱警揚絳曰致齋而觀鼓吹非禮也仁宗從之出知河陽召判流內銓拜翰林學士遷右諫議大夫御史中丞 神宗嘗問天下遺利絳請盡地力因言差役之弊害農業傷民財願更定其法神宗嘉之役議自此始矣遂領制置三司條例司與王安石共事拜叅

知政事夏人犯環慶絳請行即拜陝西宣撫使治兵
鄜延遣偏將种諤出青澗趨銀州破撫寧開元諸帳
築囉兀等城自高奴通河東塞詔兼河東宣撫使即
軍中拜同中書門下平章事移知鄧州熙寧七年復
拜同中書門下平章事監修國史絳繼王安石為相
請置局中書鈎攷用度以均節邦計事多留滯不決
逾月以疾辭位出知許州徙太原建節知定州徙河
南移鎮江封康國公加儀同判大名致仕薨謚獻肅

韓維字持國幼篤志問學以父任為將作監主簿闔門
不仕文彥博薦維好古嗜學安於靜退富弼帥河東
辟掌幕府史館修撰歐陽修薦為檢討知太常禮院
神宗封淮陽郡王賴王維皆為記室叅軍左右史
闕英宗訪除授例執政以維對遂同修起居注侍通
英講熙寧二年遷翰林學士知開封府明年為御史
中丞以兄絳在樞府力辭之出知襄州改許州七年
召為學士承旨加大學士維處東省踰年有忌之者

密為讒愬乃詔分司南京尚書右司王存抗聲曰韓維得罪莫知其端臣竊為朝廷惜乃還大學士久之以太子少傅致仕轉少師卒年八十二

韓琦字稚圭相州安陽人也風骨秀異弱冠舉進士太史奏五色雲見左右侍從皆賀於殿上通判淄州再遷太常丞直集賢院監左藏庫歷開封府推官三司度支判官為右司諫王魯見琦論事正直有本末喜謂琦曰比年臺諫多畏避為自安計否則激切近名

如君固不負所職諫官宜若此曾正人也琦得此益
自信 益利歲饑為兩路安撫使為饘粥濟饑人一
百九十餘萬蜀人曰使者之來更生我也 元昊圍
延州琦適自蜀還論西州形勢甚悉乃以為陝西安
撫使繼知秦州 尋以舊職充陝西四路經略安撫
招討使屯涇州琦與范仲淹在兵間最久二人名重
一時人心歸之朝廷倚以為重故天下稱為韓范
仁宗急於求治開天章閣賜坐咨訪時務琦條上九

事又獻七事議稍用而小人已側目矣入為工部尚書三司使除樞密使冊拜同中書門下平章事集賢殿大學士仁宗既連失褒豫鄂三王至和中得疾皇子未立中外憂之范鎮首發其議司馬光繼之自是言者常以固天下根本為急而富弼亦屢上言歐陽修因水災再上疏輒留中如此五六年言者稍怠琦乘間奏請立皇子時司馬光呂誨皆言立皇嗣中書因將二疏以請仁宗曰朕有意久矣顧未得其人

耳宗室中誰可者琦對曰臣等無由知之當出自聖
斷仁宗乃稱英宗舊名琦奏曰此事至大陛下今夕
更思之來日取旨明日請對仁宗曰決無疑矣時英
宗方居濮王憂遂識起復秦州防禦使知宗正寺仁
宗大喜琦奏曰此事既行不可中止仁宗首肯之時
嘉祐六年也英宗入居慶寧宮封琦儀國公英宗即
位加門下侍郎兼兵部尚書進封魏國公

韓定辭不知何許人為鎮州王鎔書記聘燕帥劉仁恭

有酬馬郁詩崇霞臺上神仙客學辦癡龍藝最多盛

德好將銀筆述麗詞堪與雪兒歌

見東坡記唐事

韓駒字子蒼自布衣有詩名前輩稱許之潁濱題其詩

卷云唐朝文士例能詩李杜高深到者稀我讀君詩

笑無語恍然再見儲光義子蒼嘗云作詩文當得人

印可乃自不疑所以前輩汲汲於求知也政和初上

書召試除祕書省正字後知黃州累奉祠庭終徽猷

閣待制其賦太一真人卧蓮葉舟和李上舍冬日為

葛亞卿作十絕比噲炙人口曾端伯謂昔人嘗論文
章有兩等山林草野之文其氣枯槁著書立言是也
朝廷臺閣之文其氣溫潤演綸視草之所尚也王安
國亦云文章格調須得官樣若子蒼者乃臺閣之文
所謂官樣者歟其詩亦然內外制多用西漢語故溫
潤有體

寒 二百九十二

周武王子韓侯之後避難改寒氏一云夏諸侯寒浞之

後

後漢寒朗字伯奇魯國薛人博通書傳以尚書教授舉孝廉永平中守侍御史廷爭楚獄之寃篤矣仁者之情遷濟陽令去官百姓追思之三老吏人上書陳其政狀由是辟為司徒府

干 二百九十三

左傳宋大夫干犇之後

晉書干寶字令升父瑩丹陽丞寶博覽書記以才器

名為著作郎 家貧求補山陰令遷始安太守 著
晉記二十卷直而能婉咸稱良史 撰搜神記號曰

鬼董狐

蘭 二百九十四

鄭穆公支孫以王父字為氏漢有武陵太守蘭廣

南史蘭欽字休明父子雲以軍功至冀州刺史欽有謀
略勇決善戰進號智武將軍百日中再破魏軍威振
鄰國為衡州刺史有惠政

檀 二百九十五

姓纂姜姓齊公族有食瑕丘檀城因以命氏

後漢黨錮檀數字文有家貧而志清不受鄉里施惠立
精舍教授常數百人 後舉方正對策合宜遷議郎
補蒙令以郡守非其人棄官去

晉書檀憑之字慶子少有志力閨門邕肅為世所稱
忠烈果毅亡身為國終建武將軍

南史檀道濟都督諸軍侵魏資糧竭濟夜唱籌量沙以

少米散其上及旦魏軍謂資糧有餘故不復追魏甚
憚之圖以穰鬼進司空鎮壽陽後文帝疾義康矯
詔誅之時人歌曰可憐白浮鳩枉殺檀江州道濟
見收憤怒氣盛目光如炬脫幘投地曰乃壞汝萬里
長城

檀韶字令孫道濟之兄後拜江州刺史子臻字係宗
位員外郎臻子珪字伯玉王僧虔以為叅軍珪訴
僧虔求祿不得與書曰僕一門雖謝文通乃忝武達

羣從姑叔三媾帝姻而令子姪餓死遂不荷潤蟬腹龜腸為日已久饑彫能嚇人遽與肉餓驕不噬誰為落毛乃用為安成郡丞

檀祗字恭叔與弟道濟俱叅義舉

文學檀超字悅祖少好文學位國子博士叔父道鸞字萬安亦有文學撰續晉陽秋位國子博士

北史檀翥字鳳翔好讀書解屬文仕魏除中書舍人以才學自業加以清介志能之士也

欒

二百九十六

姓纂唐叔虞之後晉靖侯孫賓食采欒邑因氏焉

國語趙文子冠見欒武子武子曰美哉華則榮矣實之不知請務實乎

左傳襄公十六年晉平公即位欒盈為公族大夫改服修官烝於曲沃

成公十六年宣伯使告卻犇曰魯之有季孟猶晉之有欒范也政令於是乎成

成公十八年晉悼公即位使欒黶為公族大夫使訓卿
之子弟共儉孝弟

史記欒布梁人也孝文時為燕相至將軍嘗有德者厚
報之以軍功封俞侯 燕齊之間皆為立社號曰欒
公社

後漢欒巴字叔元魏郡人為桂陽太守以郡處南垂不
嫻典訓為定婚姻喪紀之禮立學校以獎進之 遷
豫章太守巴素有道術能役鬼神

邳

音寒

二百九十七

河南官氏志馥邳氏改為邳氏

盤

二百九十八

盤瓠之後與冉譚巴李田為巴南六姓

單

二百九十九

可單氏改為單

丹

三百

丹朱之後漢有丹王君長安富人

冠 三百一

風俗通鶡冠子之後

官 三百二

見姓苑

瞞 三百三

風俗通荆蠻之後本姓蠻音訛遂為瞞氏

莞 三百四


姓苑云吳人

但 三百五

姓苑云漢有濟南太守但也

鄮 三百六

海西先賢傳鄮授漁陽令



名賢氏族言行類稿卷十五